

Werege o

Esta

Zooz ci akati werege nico

Ma kaala ci ayeedi weregeewe ci Esta noko, akanaai waanice looce o kazi Persiya baal abal alaani o kazi Zeksas e. Kaala nicigi, akati naa ceen Juuzen baal adooi kazi Esta ma iya izi alaan ci nai Persiya. Ilinlini ni waanice niini alazeet cin noko ma iya obora baabani o ka kidicaai ol o Juuz. Orogoz ni niini noogo moozete onin, been reezinte onin azezi ol ogin, eela ni naati ka waan kidicaai moddo noogo. Ma geenyize onin appe, omogit Juuza moddo ugeec amarno ma adica noogo dook lai. Atalit ni goon Juuza irkitook dook iiten uneen madicooco mogiinto kazi Purim.

Abore alaani o naiye kazi Vacti

1 ¹ Agooni zin waanice kaala nicigi dook irkitoowe baal abali looc alaani o kazi Zeksas ^a e. Abal baale niini loocok ceen kaboon codoi ki eetom ki toorgerem (127), akana looce o kazi Indiya zee been looc o Kuc. ² Ma iinyaye niceke, aavi Zeksas nicini leceere onin alazeetu abil kutuure o adikir tiitiny kazi Cucan. ³ Mazi ako aruum irkitook iyu alazeete onin, aanyeyun niini ol kidimdiimanit dayiin ci meelik root ele, ma awaa ol ogin tiitinyik ki ol ogin eegin alaat alinlijoonek noon dook. Waanice alaata o taakirnya o Persiya kibeena o Midiya been alaat o loocowu aavtiz to. ⁴ Eyselizaak ni niini ol arakzeet kibeena dindjooon ci alazeet onin iinya ceen kaboon codoi ki eet wec (180).

⁵ Mazi ot idicaai iinya ceen kaboon codoi ki eet wec noko, utuguuwek alaani ol ci abaak kutuure ci Cucan noko dayiin ci meelik root ele iinya toorgerem koroo onin reera, ma avu ol o tiitinyik kibeena ol o celbezik o abaak kutuure ci Cucan noko dook. ⁶ Adimdiiman waanice ol reerun kitiliza naati iirimi ruumane ci vorik kibeena ruumane ci colai eegin jalo. Acaboonek waanice ruumane nicigi looronyaye ci vorik kibeena eci regeek aloolai boone o abon zurteenen ceen nyapokodeen eel kitiirwa ci agoonnyai biyene ci vorik aliimez tadeena. Anyak waanice njinaante lecere ci agoonnyai warkine kibeena zurteenene ci aaronek loota biyeen ceen kagora ci aliimez ci anyak goolnya ci meelik keenti. ⁷ Enjeryeek ni gabara ol nyaantane diicete ci anjorooow keenti ci agoonnyai warkine, ma ayelzaak alaani ol irkeen onin

^a1:1 Zeksas: Niini alaan o kazi zaar oogi ne Aacurus ele neen.

nyaantanene ci meelik ɔrɔɔt ɛɛ. ⁸ Ma aricaneeɛ alaani ɔl o aɲereek ɔl nyaantane e gi ci aneeɛ ne, aanycek gɔɔn eet coo kowod nyaan ci olla arɔɔɲ niini zɛɛ ma ajeez.

⁹ Ma aanyek buk alaani o ɲaiye kazi Vacti ɲaai dayiin ci meelik ɔrɔɔt ɛɛ korge ci alaano noko.

¹⁰ Ma iitene ci aɲoorneɛ iinya ceen toorgerem adayi ɔl dayiin ci meelik ɔrɔɔt ɛɛ noko, atalo alaani ɲaati awodi nyaan, iricaneeɛ ni gabara ogin apayai teeri eegin toorgerem, o kazi Mewuman ki Bizta ki Arbona ki Bikta ki Abakta ki Zetar kibeɛn Karkas, ¹¹ ka kɔɔt kanyaktaak nɔɔnɔ Vacti ween alaan o ɲai ɲaati aborɛɛɛ kavuur onin alazeetu. Arɔɔɲ alaani nɔɔnɔ ka kiiya kibil ɔl ween alaat kibeɛn ɔl dook ɲuuma ka kicinɪt ɔl linat onin, eeci waanice alina niini ɔrɔɔt ɛɛ. ¹² Bar mazi avɔ aduwaak niigi Vacti zɔɔz nico, ujura alaɲaan aku. Mazi ako azii alaani juraan cin o, otobor nɔɔɲ ɔrɔɔt ɛɛ.

¹³ Otowaa ni alaani ɔl o ageeny ma aga lootinok, eeci gɔɔn laadun alaani ajin ɔl o aga lootinok kibeɛn zɔɔzok o payiinto juruunɲ. ¹⁴ Eegin ɔl cigine gɔɔn iloot nɔɔnɔ o toorgerem. Zaar zin ci ɔl nicoko nɛɛn ceegi: Karsena ki Cetar ki Adimata ki Tarcic ki Merez ki Marsena been Memukan. Niigi ɔl ci tiitinyik ɔrɔɔt ɛɛ looce o Persiya kibeɛn Midiya ma ajɔɲzɔ gɔɔn kibeɛn alaan noko.

¹⁵ Ijino ni alaani Zeksas izi nɛ, “Azi yo gɔɔn lootinowa nɛ, abon agoononek alaan ci ɲai kazi Vacti noko gitaaz giye calaɲ arɔɔɲ kiziye molook o ayiteek gabara ona kawɛ naana alaani Zeksas nɔɔnɔ e?”

¹⁶ Abariz ni Memukan ɲaati aavtiye alaani kibeɛn ɔl ogin eegin alaat alinɲiɲoonek nɔɔnɔ to gi ci azi nɛ, “Abac alaani Vacti zɔɔz nico, alaɲ zin abacaak zɔɔz nico alaan doon, bar abacaak buk ɔl ogin eegin alaat alinɲiɲoonek nɔɔnɔ dook been ɔl o abaak loocowe o abal alaani Zeksas dook. ¹⁷ Ma gi ci gerzɛ agɔɔn alaani ci ɲaiye noko, mǎ agawɛ ɲaane dook, apɛɛz buk koca tiɲeere ɲaai eet ma azi nɛ, ‘Ibaale aricaneeɛ alaani Zeksas alaan o ɲai Vacti ka kanyayaak nɔɔnɔ ɔl ɲuuma, ma ajura niini ɲaati akuuni labak.’ ¹⁸ Inoko tedeec iitene nico ɛɛ, mǎ azii ɲaai ci ɔl ween alaat o Persiya kibeɛn o Midiya dook gi ci agɔɔn alaani Vacti noko, agoonek buk koca niigi eet ugeec gi ci abil noko ɛɛ. Anyawuun zin koca pɛɛzɔnet ki bacɔɔn. ¹⁹ Inoko zin mǎ atalna alaani zɔɔz caan o, abon ayɛɛd ricaniin ci aromoonek lootinok o Persiya kibeɛn o Midiya ka kɔkɔm bodo eet ci ɛɛya noko been nɛɛn. Aboroc koca lootinowa nicigi alaan Vacti nico ma alaɲ bodo ka kicin alaan Zeksas been nɛɛn ka zin koca keɲɛryai ɲaa omaan ci abona kujuk nɔɔnɔ ka kiiya kirigiz ɲintin o. ²⁰ Mǎ koca azii ɲaai ricaniin ci alaano noko ka kotoɲole eet ugeecek eegin alaat o adikir ki o milinyik loocowe ci abal niini o dook.”

²¹ Atalta ni alaani kibe'en ɔl ogin eegin ala'at alinliŋoonek nɔɔnɔ dook baabani ci aduwa Memukan noko, utuguu ni alaani eona aduwaan Memukan e. ²² Itoonek ni alaani weregeenya loocok ogin abal niini dook. Ayeedi gɔɔn weregeewi ceeni otooge ci ɔl ci looc nice ɛɛ. Ayeedi gɔɔn weregeewe coo zɔɔz ci azi nɛ, abon eeta anyak dɔɔyiz ci abali ŋaai ugeec kibe'en dɔɔl ugeec.

Aŋeryai Esta kizi alaan ci ŋai

2 ¹ Ma vuruta, mazi ook abadaai alaani Zeksas ziniz bornet nɔɔŋa, aada niini alaan o ŋai Vacti, kibe'en buk gi baal agoonek nɔɔnɔ Vacti e, kibe'en lootinet baal aduŋnaan giye ci Vacti e. ² Iziti ni gabara o aɲɔŋɔz alaan nɛ, “Kɔɔɔŋtak alaan dɔɔl ceen kabarze alina. ³ Abon aanyek alaani ala'at loocowe dook kanyaktaak nɔɔnɔ dɔɔl ceen kabarze alina kutuure ci Cucan adikir tiitiny noko ka kanyaktaak ɔl gabareen onin apayai teeri kazi Egai ka kiiya kozooti kabarze nicoko ma aanyek nɔɔgɔ kaal ci vuudento ka kigirgirit eleeti juruun. ⁴ Ka mǎ anyak doole ci agɔɔn gi ci aanyek alaan katalɔ, aŋeryai doole nicini kizi alaan ci ŋai ci ka kirigiz zɔɔ o Vacti.” Atala ni alaani zɔɔz nico ɔɔɔt, ma alinliŋi eenico ɛɛ.

⁵ Anyak waanice kutuure ci Cucan noko eet ceen Juuzen ci kidon o Benjimen, kazi zaar cigin nɛ, Mordekai ceen ŋeerti Jayir, Jayir ceen ŋeerti Cimei, Cimei ceen ŋeerti Kiic.

⁶ Agamnyi waanice Mordekai Jerusalema, ma akɔyi Nebokadnezar ween alaan o abal Babilon. Ma olee ci baal agamnyi noko, aavi alaani o looc o Juda kazi Jekoniya^b tɔ. ⁷ Anyak zin waanice Mordekai nicini doole ci gɔtɔni baatin ci alina ɔɔɔt ci kazi zaar nɛ, Esta, kazi zaar cigin Ibiroye nɛ, Adasa. Adaayitɔ waanice nɔɔnɔ baatine ki yaatin, abayiza ni Mordekai nɔɔnɔ kiyo beenyin o.

⁸ Mazi akɔ aduyai ricanin o alaano, anyayaak kabarze ci meelik kutuur ci Cucan noko, aanycek ni ɔl kozooti nɔɔgɔ Egai. Ɔzɔɔte ni buk waanice Esta ook korge o alaano. Ma aanyonek buk niini Egai o azooni kabarze nicoko e. ⁹ Icina ni Egai keberɛeci Esta ma aɛɛz ɔɔɔt. Kataman nɔkɔ, aanyeyun niini nɔɔnɔ kaal ci vuudento ka kigirgir ɛɛ ma aanyek dayiin cigin doon. Ɛŋeraak ni niini nɔɔnɔ gabara ci ŋai toorgerem korge o alaano ci ka gɔɔn kilinliŋtoozek nɔɔnɔ, ooyi ni niini nɔɔnɔ kibe'en gabara nicoko ma akɔ aarek ŋinti abon ɔɔɔt ŋao gɔɔn abaayi kabarze o. ¹⁰ Maje Esta alaŋ ɛɛ abɔɔra kagawe kizi vurut cine ɔl ci tatoog jaŋ, eeci aricaneek Mordekai nɔɔnɔ ka calaŋ abɔɔra ɛɛ. ¹¹ Aku gɔɔn adeɛb Mordekai reerun ci abaayi kabarze noko ka kiiya kicin avuzit ci Esta o, karabon aavi juruun.

^b2:6 Jekoniya: Kazi bodo zaar oogi Ibiroye nɛ, Jeyojakin.

¹² Gɔɔn waanice ma anyak kabarze nicigi ɲaatineɲ ci ka kook alaana ɲaati Zeksas, agoononek rak nɔɔnɔ kaala ci ka kitilizaai irkit codoi dook. Gɔɔn rak nyeelowene ci oowu een tɔɔrkɔnɔm o, avuudi ɲooroce o kazi miir ka kigirgir ɛɛ, ma nyeelowene ceen tɔɔrkɔnɔm aɲoorneke o, avuudi karacooca kibeɛn kaarkarete ci aɲɔl mɛdiz. ¹³ Mazi ka kook kabarzeeci nicini alaana, aanyonek nɔɔnɔ awaaca o arɔɔɲ dook ceeze o abaayi kabarze e ka kooyi korge o alaano. ¹⁴ Ma yoomana, akɔ doole ɲinaante, ma ɲeere, amiironek ɲinoma ɲao abaayi ɲaai o azooni ɛeti o apayai teeri kazi Cayacigaz o gɔɔn azooni ɲaai o alaano aavtiz. Mate atalne alaani doolece nico, akɔ awo nɔɔnɔ zaar ka kabadaak nɔɔnɔ bodo. Mazi te alaɲ alaani atalne ɲaatin, alaɲ bodo doole nicini nɔɔnɔ amiironek.

¹⁵ Mazi akɔ aku waɲi o Esta baal abakza Mordekai een tinaati gɔtɔni baatin o kazi Abiyail e ka kook alaana, akɔm niini gi ci aɲin, anyak niini kaal baal aɲeraak Egai e doon. Waanice olla ɛeti ci acin Esta atalne ɲaatin. ¹⁶ Ooti ni ɔl Esta alaana ɲaati Zeksas ɲaonin alazeetu abaayi nyeelowe ween amɔtɔ kazi Tɛbez, irkite ween toorgerɛm irkitoowe o baliin onin.

¹⁷ Ereezun ni alaani Esta ɔrɔɔt kujuk ɲaai coko dook, ma alinaak Esta nɔɔnɔ ɔrɔɔt kujuk kabarze ci gaaga o dook. Oboroceɛke ni alaani nɔɔnɔ kavuur o alazeetu ɔɔ, aanyeyun ni nɔɔnɔ kizi alaan ci ɲai ka kirigiz ɔɔ o Vacti. ¹⁸ Ma giye o arɔɔɲi alaani ka kidiziɲi Esta, aanyeyun ɔl kutuguuzɔ dayiin ci meelik ɔrɔɔt ka kivita kadayit ɔl oɲine tiitinyik kibeɛn ɔl oɲin eegin alaati alinɲliɲoonek nɔɔnɔ dook. Uduwa ni ɔɔɔ ci ka kuyubuzti ɔl loocowe oɲin abal niini dook, ma aɲereek ɔl kaal ci adizki nɔɔɔgɔ irkeente ci alazeet onin.

Abɔɔra Mordekai gi ci anyayeek ɔl alaan

¹⁹ Mazi avɔ alote kabarze bodo eci vuruto, aavu Mordekai kɔrɔɔg o alaano araana, giye o iizɔi niini alaan. ²⁰ Maje Esta, ɲaan kuduwaak ɔl gi ci ɛɛne niini doole ci looc ɲaɲ, karabɔɲ een doole ci vurut ci ɔl ɲaɲ, karabɔɲ een tatoog ɲaɲ ebaal aricanɛɛke Mordekai nɔɔnɔ e, emɛda ni niini izik zoɔzok o aduwaak Mordekai nɔkɔ eonin baal laadun abakzaan niini nɔɔnɔ e. ²¹ Ma iinyaye baal iizɔi Mordekai alaan ma aavei korge o alaano e, abɛk gɔɔn waanice kɔrɔɔg ci alaano o araan gabareɛnti o kazi Bigzana kibeɛn Terec, otoborit ni niigi nɔɔɲ ma aɲɔmɔt gi ci ka komoonyci alaan Zeksas. ²² Mazi akɔ ajowa Mordekai ɲomtiin cineɲ noko, ook uduwaak alaan o ɲai Esta, ook ni uduwaak Esta alaan kaaviyak ci anyaak Mordekai nɔɔnɔ noko. ²³ Mazi ook agawuun alaani ɛɛemnyai kaaviyawa nicigi, acabtoozek ɔl ceen ram noko alemeeti keena keene ceen kitiirwa. Eteyeede ni kaala nicigi dook weregeewe o ayeedine kaala o agooni alaan Zeksas ɲuuma.

Baabani o Aman ka kidicaai Juuz

3 ¹ Ma vurute ci utuguuzɔi kaala nicigi dook, iya ɔɔɔnya alaani Zeksas Aman ween ɲeerti Amedaza, ween doole ci kidonɔ o kazi Agag kizi alaan ci adikir alaate o alinlijoonek nɔɔɔ dook. ² Iricaneek ni niini alaat o gɔɔn alinliɲ kɔɔɔg onin araana dook gi ci abon atiitinyi niigi Aman ɲaati gɔɔn akani kozoŋti looc nɔɔɔ ɲuuma. Agamta ni niigi dook gi nico, ma akani gɔɔn kozoŋti looc Aman ɲuuma giye o uduwaake alaani nɔɔɔ gi nico. Maje bar Mordekai, alaɲ akani kozoŋti looc ka kitiitiny nɔɔɔ.

³ Ijinit ni alaata o alinliɲ kɔɔɔg o alaano araana Mordekai eneeekteɲ, “Ma niina gi ci arican alaani o alaɲ azii o naa?” ⁴ Oɔtoontek ni gɔɔn niigi Mordekai zɔɔz nico tup nɔkɔ, maje bar Mordekai abor gi nico. Uduktaak ni niigi Aman gi calaɲ atiitinyi Mordekai nɔɔɔ o ka kicinit karabɔɲ ooɲ Aman gi ci agɔɔn Mordekai o labak, eeci aneek Mordekai nɔɔɔ ɲe, keen naana Juuzen.

⁵ Otoɔbor ni Aman nɔɔɲ ɔɔɔt giye ci alaɲ Mordekai akani kozoŋti looc ka kitiitinyi nɔɔɔ o. ⁶ Mazi ako ajowa Aman bar da Mordekai eet ceen Juuzen, abaabanun gi ci azi ɲe, mɔ karui nɔɔɔ doon kadaak, alaɲ koca kajeez juruunɲ. Orooɲun ni Aman gɔɔl ci ka kidicaai Juuz o abaak loocowe o abal Zeksas dook lai.

⁷ Ma nyeelowe wodoi kazi Nisan ^c irkite ween amonki ram irkitoowe baal abali alaani Zeksas looc, aarit niigi maadico Aman ɲuuma ka keɲerta iiten ki nyeelok ci ka kutuguuwɔi gi nicini, itaak ni maadico nyeelok ween amonki ram kazi Adar ^d. (Azi ɔl o Persiya maadico ɲe, pur.) ⁸ Eneek ni Aman alaan Zeksas ɲe, “Anyak ɔl oogi ci azaanonek loocok cugun abal noko dook, ma acaano ki ɔl loocowe cugun noko, anyak niigi keerane cigeec ci aɲɔɔɔwɔ ki ɔl dook ma alaɲ azii lootinok cugun o. Akom zin niina alaani gi ci ka jowa ɲaatinen ka toɲi nɔɔɔ korogit looce cun o. ⁹ Anyak zin baabani ci kaanyin ceeni, mɔ atalna niina alaani baabani nico, duunai zɔɔz ci arican ci ka dicaai nɔɔɔ ka zin naana kaarek zurteenen ceen kiilowet ceen alivet ceen kaboot iiyu ki eet ram ki tuur (345,000) loidonɲe ugun alazeetu ka kilinliɲtoozekin ɔl ugune.”

¹⁰ Agama ni alaani zɔɔz nico ma aborcaak nyapokodeec onin aziito gɔɔn aɲonyeek weregeenya o linlijoonto ka kagayi ɔl avu weregeenya nicigi alaana o, ma aanyek Aman ween ɲeerti Amedaza, ween doole ci kidonɔ o Agag, o amarniin ɔl o Juuz. ¹¹ Eneek ni alaani

^c3:7 Nisan: Nyeelok wodoi Babilona neen.

^d3:7 Adar Adar: Nyeelok ween amonki ram Babilona neen.

Aman ne, “Tuguu gi ci olla aroonj tuguuwek ol nicoko labak. Maje zurteenen cugun o, nyawo labak.”

¹² Ma iitene ween amonki iiyu nyeelowe wodoi kazi Nisan, otoyai ol o goon ayeedonek alaan ma aku aricaneek Aman noogo ka keteyeedit weregeenya utugeetine o alinjliji ol loocowe o abal alaani Zeksas. Itoontozek ni weregeenya nicigi alaat o abal loocok dook, kibeek rakcook o ol o abaak loocowe o abal Zeksas dook. Ayeedi waanice weregeenya nicigi zaare o alaano ma anonyoonek nyapokodeeci online. ¹³ Ooti ni ol o itoon niini e weregeenya nicoko loocowe dook, ayeedi weregeenyaye nicoko gi ci azi ne, iitene ween amonki iiyu nyeelowe ween amonki ram kazi Adar, abon ol o Juuz dook, dikirɔni ki kidiczeet, maaczet ki najeyzeet, been dool atonde kidicaai lai ka koorya ol kaal ugeec. ¹⁴ Uduuna ni ricanii ci werege nico kizi lootinet loocowe dook, ma aduyaak ol moddeene dook ka kereya iiten nice. ¹⁵ Iyiikti ni ol o itooni e weregeenya nicoko eona aduwaake alaani noogo e, aduyai waanice ricanii nicini kutuure o Cucan adikir tiitiny. Uwude ni alaani kibeek Aman naati aavtiye naatodoi, maje ol Cucana baranje ooti giye ci arican alaani noko.

Aroonj Mordekai tirteen naati Esta

4 ¹ Mazi ook agawuun Mordekai kaal ci agooni noko dook, ereecun ruumane ogin ma aborceek daanki ma abuulek ele buurtane, uduun ni ook kutuura naati aluwi kakaaka ziniz kegereny ɔɔɔt ele moloowe ci appe. ² Ook ni niini noko zee been koɔɔg o alaano araan, maje goon laadun eeti ci anyak daanki, alanj oonjai kook korge ci alaano o ecito. ³ Mazi ako aruum zɔɔz ci baal arican alaani noko loocok dook, utuluuzɔ ol ci Juuz o ɔɔɔt ele, otonjit ni niigi dayiin, utuluuzɔ ma iboobi ɔɔɔt ele zooze nico. Uburuceek ni ol ci meelik naatinen daanket ma oogin buurtanen.

⁴ Ivita ni gabara o najyeek kibeek o apayai teeri goon alinjlijoonek Esta ma avu aduwaak noono zɔɔz ci Mordekai noko, alacaai ni Esta ɔɔɔt ele. Itoonek ni noono ruumane ci ka kook koboroceek ka kaara daanki, otober ni bar Mordekai ruumane nicoko. ⁵ Otowaa ni Esta Atak ween eet codoi olee o apayai teeri o anjeryai ka kilinjlijoozek noono, ma aku aricaneek noono ka kook kojowa gi ci laadun alacaan Mordekai ɔɔɔt o.

⁶ Uduun ni Atak ook naati Mordekai baale o kutuuro avenno ki araan o koɔɔg o alaano. ⁷ Uduwaak ni Mordekai noono kaal o agoononek noono dook, kibeek zurteenen o meelik aterked Aman ka kaarek loidone o alaano alazeetu ka kidicaai Juuz lai. ⁸ Aanyeyun ni buk Mordekai Atak werege baal ayeedine zɔɔz baal aricani Cucana ka kidicaai Juuza dook e ka

kook keyeelek Esta ma oobek zóóz nico. Ma aduwaak buk Mordekai Atak ka kook kiricaneele Esta kook alaana ka kook kiilalek nóónó giye ci ɔl cigin Juuz noko.

⁹ Imiire ni Atak ook uduwaak Esta kaal o aduwaak Mordekai nóónó e. ¹⁰ Uduwaak ni bodo Esta Atak ka kook keneek Mordekai ne, ¹¹ “Aga alaata o alinjlijoonek alaan dook, kibeene ɔl o loocok ogin dook gi ci mā ka kook eeti karabonj een ŋaa kuruumto ki alaan kóróóg keenje ci ecito e ma alanj een eet ci awaa niini, aruwe eeti nicini kadaak, eeci adoi alaan lootinet cine o ɬor noko. Dook e coma itoonek alaani nóónó keet onin een warki alazeetu, o ka koca korogi neen. Kanyawa zin inoko iinya ceen eetom kamoto dook ci ŋaan alaani kutuyaana.”

¹² Mazi ako aduyaak Mordekai zoozowa ci ona itoonak Esta noko, ¹³ itoonek niini Esta zóóz ci aneek ne, “Má bar abaaban kizik arugi tiŋeere niina doon eeci aave korge ci alaano o ka kadaayito Juuza ceegi dook. ¹⁴ Mā ajaake waŋe nico, ŋaan aku tirteen ki elyaan ci ɔl ci Juuz o ŋaaman, maje bar zin niina kibeene ɔl o tatoog o baatun, ŋaan adaaknu noko. Ma da laadun aanyonekin alazeet o alanj ka elaa kaal ci eel noko kebereece nico.”

¹⁵ Imiiozeke ni Esta Mordekai molook ci aneek ne, ¹⁶ “Bitɔ lot ɔl o Juuz dook Cucana kaavtiyo ŋaatodoi ka kotonjit dayiin ki maam baalinok ki waazinok iinya iiyu giye caan. Maje buk naana kibeene gabara ogan ŋai, kuunna dayiin ki maam kiyo buk niiga o. Eenece zin ka kook alaana, yo nuun abaco zóóz nicini ki lootinet o alaano o, mate kako kadaai, kadaai labak.”

¹⁷ Ook ni utuguu Mordekai kaal ci aduwaak Esta nóónó noko dook.

Iilalek Esta alaan

5 ¹ Ma iitene ween iiyu iinyaye baal aborni niigi dayiin ki maam e, oboroceek Esta ruumane ogin alazeetu ma ako abil kóróóg o alaano keenje ci ecito e. Maje waanice alaani, aavi leceere onin alazeetu ŋaonin alazeetu akoyi keenj ki ceez otog. ² Mazi ako acin niini alaan o ŋai Esta abil ŋinaante, atalo ŋaatin ma itoonek keet onin een warki alazeetu goon anyak aziita. Iiyak ni Esta nóónó ma aku uum keet cin een warki alazeetu noko.

³ Ijинуun ni alaani nóónó eneele ne, “Anyaanin ŋina nii, alaan o ŋai Esta? Aroonj te laa ŋaatan gitaaz? Yo nuun aroonj looc caan kabal noko libir codoi dook, aanyonekin.”

⁴ Ebedeek ni Esta nóónó eneele ne, “Mā atalne niina alaani ŋaatan, kako tedeec waanico kadimdimaneekin dayiin ci meelik ɔróót, ija zin niina ɔrkorta kibeene Aman.”

⁵ Eneek ni alaani gabara ogin ne, “Iyiyit ɔto utuyaayanj Aman kataman ka kivita koota ŋaati awuyeet Esta o.” ɔto ni alaani kibeene Aman dayiine ci meelik ona adimdiimanek Esta nóógó noko.

⁶ Ɔɔtɔ ni alaani kibeen Aman korge o Esta, mazi ɲaan awod niigi nyaan nɔkɔ, ijɲuun bodo alaani Esta eneeƙ nɛ, “Mayo inoko aroon ɣitaaz? Olla gi ci aroon o, kaanyin. Yo nuun aroon looc caan kabal noko libir codoi dook, aanyonekin.”

⁷ Ebɛdɛɛkɛ ni Esta nɔnɔ eneeƙ nɛ, “Gi ci karoon ɲaatun nɛn ceeni: ⁸ Mǎ atalne niina alaani ɲaatan ma aroon nyaan gi ci karoon ɲaatun o, ivita tiɲeere niina kibeen Aman ka ivitaak dayiin oogi ci meelik ci bodo ka kidimdiimaneyun tiɲeere. ɲaan zin eenece kabarzeekin gi ci ajinaan o.”

Arɔon Aman ka kuruk Mordekai

⁹ Uduuna ni Aman iitene nice korge o alaano ɲaati anyayi talniin ci appe ɔrɔt. Bar mazi aku ajowa niini Mordekai kɔrɔɔg o alaano araana, mazi aɲaamnek alaɲ Mordekai aɲaamnek nɔnɔ ka keyelizaak ɲoliin, otoboreek niini Mordekai nɔon ɔrɔt ɛɛ. ¹⁰ Agamuun ni Aman ziniz giye nico ook olee onin. Ook ni otowaa niini laaɲotigin kibeen ɲaa onin kazi Zerec, ¹¹ ma aku abɔɔli Aman nɔɔgɔ kaale ogin meelik anyak ki logoze ogin meelik, kibeen giye o aanyeke alaani nɔnɔ ɛɛzɛt ma adonɲi nɔnɔ kidikir alaate o alɲɲiɲoonɛk alaan dook. ¹² Izi ni Aman nɛ, “Alaɲ een bar dook nɛn nicini. Awuyaan uyen alaani o ɲaiye Esta kɔɔrkɔrta ki alaan naana doon koota kadakta dayiin ci meelik ɔrɔt agooneket, ma bodo ni awuyaan aneeta kibeen alaan ka koota tiɲeere. ¹³ Bar zin mǎ ɲaan kacin Mordekai ween Juuzen aavi kɔrɔɔg o alaano araana nɔkɔ o, akɔm kaale nicoko dook gi ci kejeez.”

¹⁴ Eneektek ni ɲaa online been laaɲotigin nɔnɔ nɛ, “Tɔdɔwa kitiirwa ci wuuntik eegin mitireet eetom ki iiyu ka duwaak alaan ka kacabeek Mordekai alɛm keet tiɲeere ririwɔna. Mazi oodot, ka ni oorkorit ki alaan ɔtɔ dayiine ci meelik ɔrɔt neke ɲaati atalniine.” Aanyeyun ni zɔɔz nicini Aman katalɔ ɔrɔt, ma adɔɔda kitiirwa eona aduwoonekɛ e.

Aanyek alaani Mordekai ɛɛzɛt

6 ¹ Ma baaline nice, ɲaan alaani Zeksas katanu nɔkɔ been nɛn, iricaneek ni niini ol kanyaktaak werege o ayeedine kaala iinyaye ci baal ɛɛnɛ niini alaan noko ka kivita kekeebtek nɔnɔ. ² Ojoyai ni gi baal abɔɔrane Mordekai gabara ween ram apayai teeri o kazi Bigzana been Terec baal gɔon abek araan o kɔrɔɔg o alaano baal aɲɔmɔt gi ci ka waan komoonyci alaan Zeksas e.

³ Ijɲɔ ni alaani izi nɛ, “Inoko zin da giye nico anyawuun gi ci aanyonek Mordekai tɔ?” Abarzeek ni gabara ogine nɔnɔ eneektek nɛ, “Akɔm gi ci aanyonek kina.”

⁴ Ijino ni alaani izi ne, “Inoko olee ween alaat aavi koroog keeja ne?” Eenico ele, iiyak Aman koroog o alaano keeja ci bitaalu ka kiiya kozoozit ki alaan gi o ka kacaboozeke Mordekai alem keet kitiirwane ona adoodak noono e.

⁵ Eneektek ni alaan gabara ogine ne, “Abil Aman koroog keeja.” Eneek ni alaani noogo ne, “Aanycek zin kiiya.”

⁶ Mazi aku Aman ceez ecito, ijin alaani noono eneek ne, “Inoko eet ci aroog alaani keyelizaak eezet, abon aanyonek gitaaz?”

Abaabanewun ni bar Aman gi nico ele onin maany izi ne, “Ineen ka koca bodo omaan ci ka kaanyek alaani eezet o, alaj ka een aneet ele?” ⁷ Abarizeek ni niini alaan eneek ne, “Eet ci olla te aroog niina alaani anyeek eezet o, ⁸ anyeek ol kanyakta ruum unun alazeetu goon aborcee o, ki joom unun goon atodi o, ki kavuur o alazeetu goon anyak joomi owa o, ⁹ ka ija anyeek eet codoi olee ugun eegin alaat ci mayaani gonogiin koboroceke ruum ci alazeetu noko eet ci te aroog anyeek eezet o ka karawoo noono jooma konowi goolok kutuur keeja, ma agereny naati arayiin noono azi ne, ‘Gi zin ci agoononek eet o aanyek alaani eezet neen nicini!’”

¹⁰ Iricaneek ni alaani noono gi ci aneek ne, “Iyiik zin bito tuguu kaal ci ona aduwa noko dook kook ci areyeekin. Biti ruum kibeena joom yiteek Mordekai ween Juuzen, aavi koroog onan araana!” ¹¹ Anyaa ni Aman ruum kibeena joom, ma aku aborceeke ma arayiin noono owa naati atodi Mordekai joom ma anowi goolok kutuur keeja, maje naato agereny noono owa azi ne, “Gi zin ci agoononek eet o aanyek alaani eezet neen nicini!”

¹² Mazi ako oodotiz, abadaak Mordekai aara o koroog o alaano. Maje Aman iyiik imiire ook olee onin naati abuni o ma aam alyani oot ele, ¹³ ook ni uduwaak niini Zerec ween naa onin kibeena laajotigin dook kaal o agooni e dook. Eneektek ni ol o goon iloot noono o kibeena naa onin noono ne, “Ma een Mordekai Juuzen o, akataai bar inoko o gi ci ka koloozi alazeet unun noono kebereen. Ma naan zin bodo niina idi noono. Ma naan idi niina noono, amogjiin koca tiyeere niini ineet.”

¹⁴ Mazi naan anyak niigi zoz nico utugeetine noko, ivita gabara o alaano apayai teeri ma avu avoyi Aman dayiine o meelik oot agoonek Esta noono kibeena alaan e kataman noko.

Iirimi Aman

7 ¹ Ooto ni alaani kibeena Aman adayit dayiin o adimdiiman Esta. ² Ma dayiine ci iiten ci vuruto noko, mazi naan awod niigi nyaan noko, ijino bodo alaani izi ne, “Alaan o nai

Esta, inoko aroonj gitaaz ka kaanyin? Yo nuun aroonj looc caan kabal noko libir codoi dook, kaanyin.”

³ Abarizeek ni alaani ci ηaiye kazi Esta noko nɔɔɔ eneeƙ ne, “Mā areezan niina alaani aneet mā atalne ηaatan alazeete unun, rogozaan aneeta kibeƙen ɔl ogan, gi ci kaala ηaatun neen nicini, ⁴ eeci naana kibeƙen ɔl ogan kaavtiyeya daayiz kibeƙen dicaan doon. Mazi te da kataalewa kizita mirɔk ceen gabara, kajaake zin waan calaƙ ka bodo kimilaawin ineet alaƙan gaaga.”

⁵ Ijiniuun ni alaani Zeksas Esta eneeƙ ne, “Aroonj kutuguu gi nico ηene? Aavi eeti ci aroonj kutuguu gi nico o ηaadaƙ?”

⁶ Ebedeƙe ni Esta nɔɔɔ eneeƙ ne, “Agɔɔn gi nico mirooiti cinaaƙ kazi Aman gerze noko!” Abarit ni Aman alaƙan Zeksas kibeƙen Esta kebereen ηina. ⁷ Itiƙa ni alaani jeena otoƙeek nyaan onin e looc ɔɔɔ ηaati aborni nɔɔɔ, ook cale onin. Aavek ni Aman alaƙan Esta bawuuca ma iilalek coma arogoz nɔɔɔ alaana, eeci agawuun niini anyawuun alaani gi ci ger ka kutuguuƙe nɔɔɔ.

⁸ Mazi abada alaani calaa akuunak ηinona dayiino e, acin bar Aman iinak lecer libir ηaona iitiren Esta e. Eƙeja ni alaani izi ne, “Aroonj kɔɔɔd alaƙan caan ηai noko koromteewa ki aneet ceeze caan o ele aneet kebereen noko?”

Mazi akɔ aduwa alaani zɔɔz nico, ubuƙit gabara Aman kebere. ⁹ Izi ni Arbona ween eet codoi olee o apayai teeri alinliƙoonek alaƙan ne, “Anyak kitiirwa ci wuuntik een mitireet eetom ki iiyu eel ceeze ci Aman e. Agɔɔnak waanice niini kitiirwa nicoko Mordekai baal bar arogoz alaƙan e ka kacabeeƙe alem keet.”

Izi ni alaani ne, “Ɔɔɔ zin acabteek Aman alem keet kitiirwane nicoko ηinaante!”

¹⁰ Ɔɔɔ ni iirimit gabara Aman kitiirwane baal agɔɔnak niini Mordekai e. Abada ni bornet nɔɔɔ o alaano e.

Aroonja alaani Zeksas Mordekai

8 ¹ Ma iitene nice ele, aanyeyun alaani Zeksas Esta kaal baal anyak Aman baal amarniin ɔl o Juuz e dook. Iiyak ni Mordekai alaƙan giye o uduwaake Esta alaƙan gi o eene Mordekai logo ci gɔtɔni baatin. ² Oboroƙa ni alaani nyapokodeec onin baal oomnyai ηaati Aman e, ma aanyek Mordekai. Aanyeyun ni Esta Mordekai kagam kaal baal Aman e dook.

Azeed Esta ki Mordekai gool ci ka korogti Juuza

³ Ook ni bodo Esta alaana ma ako akani kozoŋti looc alaan zoone kopokpok ŋaati aluwi, ma iilalek noono ka keeya baabani o Aman ween doole ci kidon o Agag ger baal anyayeeek Juuz e. ⁴ Oov ni alaani Esta keete onin een warki alazeetu, itija ni Esta ibil jeena noono ŋuuma.

⁵ Izi ni Esta ne, “Ma atalne niina alaani ŋaatan, ma areezan didi, ma abaaban gi ci ka tuguu ci aleemnyai, abon ayeedi ricanin ci ka keeya zoow baal ayeed Aman ween ŋeerti Amedaza, ween doole ci kidon o Agag ka waan kidicaai Juuza loocowe ugun abal dook lai e. ⁶ Alan agano ŋaati kacine gi ci ger akuunak ol cigan o, kibeena ateeno cigan o noko ma kajaake.”

⁷ Ebedeeki ni alaani Zeksas alaan Esta kibeena Mordekai ceen Juuzen noko eneeke ne, “Ma giye o aronji Aman kidicaai ol o Juuz lai, kuduwa waanice gi ci acabeeki ol noono alem keet kitiirwani, kaanyeya ni naana kaal ogin baal anyak e dook Esta. ⁸ Eteyeedit zin inoko o ricanin oma zaare cigan aneet alaan ka keela Juuz goole ci acinu niiga abon ŋaatunon, ononyoozek ni nyapokodeeci onane, eeci weregeenya ci ayeedi zaare cigan ma anonyoonek nyapokodeeci onane akom bodo balween kina.”

⁹ Otoyai ni ol o ayeedonek alaan niigi dook laak codoi noko iitene ween eetom ki iiyu nyeelowe ween iiyu kazi Zivan. Eteyeedek ni ricanin ci ona aduwa Mordekai akati ol ci Juuz noko ka kitoontek alaat o abal loocok dook, ki alaat oogi o alinlijoonek alaan looce nico, kibeena ol ween rakcook o ol o abaak loocowe ween kaboon codoi ki eetom ki toorgerem (127) kook kuruum Indiya been looc o Kuc. Ayeedi waanice weregeenya ci ricanin nico o loocok dook, utugeetine ci alinliji ol loocowe o abal alaani dook kuruum buk otog ci ol o Juuz. ¹⁰ Eteyeed ni Mordekai ricanin nico zaare ci alaano Zeksas, ma anonyeeek nyapokodeec onin. Iyitit ni ol o atod joomanee o alaano ayiik, ma avo aanyek weregeenya nicoko ol.

¹¹ Aanyeyun ni ricanin ci alaano noko Juuz kanyayit dooyiz kutuuryowe o adikir dook ka kulute koortoi eleeti taakirnyaye ci te goon igaanyak noogo moddeene ogeen, karabon een loocowe ogeen ka kakatit zee ma adica lai ŋaane kibeena dooleni buk. Ma aama moddo nicoko kaal ugeec dook lai. ¹² Enjeryai ni iiteni ci ka kutuguuzi Juuza gi nico loocowe o alaan Zeksas dook iiten ween amonki iiyu, nyeelowe ween amonki ram kazi Adar baal anjira Aman ka kidicaai Juuz e. ¹³ Aaronek waanice ricanin ci aduwa weregeenya nicigi o kizi lootinet ci ako loocowe dook ka kagawe olee dook ka kacaacoi Juuza moddeen o amarnin noogo.

¹⁴ Iyiyit ni ol o itoon alaani e joomanen kataman noko ooti weregeenya nicoko. Maje laadun waanice ricanin nicini adunja kutuure o Cucan adikir tiitiny.

¹⁵ Ɔtɔɔ ni Mordekai odootek alaan looc ɲaati aborɕɛɛke ruumanɛ o alazeetu anyak goolnya ci colai een jalo been ci vɔɔr, ma anyak kavuur ci appe een warki kibeɛn ruum ci wuun ci aloolai boonje o abon ci anyak gool ci rɛgɛ. Utuguuwe ni talniin ci appe kutuure ci Cucan noko ɲaati agɛrnyi ɔl talniinta. ¹⁶ Atalne waanice Juuza iitene nice ɔɔɔt ɛɛ kiziti vɔɔre zinzeeti kanyayit ɛɛzɛt ki tiitinyɔn. ¹⁷ Anyayit ni Juuza talniin loocowe dook kibeɛn kutuuryowe o aruum ricaniiɛn nicini e dook, olla ɲinti uruum ricaniiɛn ci alaano noko, anyak ɔl o Juuz talniin, ma adak dayiin ci meelik ɔɔɔt ɛɛ talniinta. Otoweec ni moddeena ci meelik eleeti kiziti Juuz, eeci aɲole niigi nɔɔɔɔ.

Amɔg Juuza ɔl o amarniin nɔɔɔɔ

9 ¹ Ma iitene ween amɔnki iiyu nyeelowe ween amɔnki ram kazi Adar, izi iiten o ka waan kutuguuwɔi ricaniiɛn baal alaano e nɛɛn. Ma iitene nice, oroɔɲit moddo o amarniin Juuz ka komogit nɔɔɔɔ ɔɔɔnta, bar ɲina otoowe zɔɔz omogit Juuza nɔɔɔɔ. ² Ulute ni Juuza kutuuryowe o loocok o alaano Zeksas adikir dook ka kigaanɲozek ɔl baal arɔɔɲ kidica nɔɔɔɔ e. Ɔkɔma ni bodo eet ci ka kinim nɔɔɔɔ, eeci otoɲole ɔl dook nɔɔɔɔ. ³ Itiritit ni alaata o abal loocok dook ki alaata oogi o alinɲiɲoonɛk alaan looce nico kibeɛn ɔl ween rakcook o ɔl o abaak loocowe dook ɔl ci Juuz o, eeci aɲole niigi Mordekai. ⁴ Ɔɔɔɲɛ ni waanice Mordekai kizi tiitiny korge o alaano kagawe tiitinyɔnti cine o loocok dook, ma aanyonek nɔɔɔɔ dɔɔyizi ci appe ɔɔɔt.

⁵ Agamit ni Juuza dilanya ugeec ɔɔt uturit moddeen o amarniin nɔɔɔɔ zɛɛ ma adica lai, ma agoonek nɔɔɔɔ kaal ci olla arɔɔɲ nɔɔɔɔ zinzeeti ugeec. ⁶ Aruk waanice Juuza kutuure o Cucan adikir tiitiny ɔl ceen kaboot tuur (500) lai. ⁷⁻¹⁰ Ma aruk buk waanice niigi lɔgɔɔz o Aman ween ɲɛerti Amɛdaza o amarniin Juuz eegin amɔɔ kadaayitɔ, Parcandaza, ki Dalvon, ki Aspata, ki Poraza, ki Adalya, ki Aridata, ki Parmacta, ki Arisai, ki Aridai, kibeɛn Vaizata, ma alaɲ kaal cigeecek o ayit.

¹¹ Odoɲtoozek ni ɔmɔɔ ci ɔl ci baal aruwe kutuure ci Cucan neke dook alaan iitene nice ɛɛ. ¹² Eneek ni alaani Esta nɛ, “Uruyit Juuza ɔl ceen kaboot tuur (500) kibeɛn lɔgɔɔz o Aman eegin amɔɔ kutuure ci Cucan noko ɲina. Inoko mǎ aruk Juuza ɔl ci meelik nɔkɔ Cucana ɲina o, ma inoko bar loocowe ogeen alaɲ aruk ɔl ci meelik ɔɔɔt? Inoko aroɔɲ bodo gitaaz? Mǎ anyak gi ci aroɔɲ, kaanyin.”

¹³ Ɛbedɛɛke ni Esta eneek nɛ, “Mǎ atalne niina alaani ɲaatan, anyeek ɔl ci Juuz o Cucana ɲina waɲi bodo tedeec ɲɛere ka kɔɔrtɔi eleeti kiyo ona agɔɔn waanico noko. Anyeek buk ɔl kɔɔt kiirimit lɔgɔɔz o Aman een amɔɔ ona aruwe e kitiirwani.”

¹⁴ Iricaneek ni alaani kutuguuzo noko. Aduwa alaani ricaniin nico Cucana, ot ni iirimit niigi logooz o Aman eegin amoto e kitiirwani. ¹⁵ Ma itene ween amonki wec nyeelowe o Adar, ulute Juuza Cucana gina ma aruk ol ceen kaboot iiyu (300) kadaayito, ma bar alaj kaal cigeec o avoyi.

¹⁶ Ulute ni buk ol o Juuz o abaa kutuuryowe ogeen loocowe ci alaano noko ka koortoi eleeti ugeec moddeene o amarniin noogo. Uruyit ni niigi ol ceen alivet ceen eet iiyu kamoto ki alivet tuur (75,000) ma bar alaj kaal cigeec o avoyi. ¹⁷ Agooni waanice gi nicini itene ween amonki iiyu nyeelowe o Adar, ma itene ween amonki wec, uyubuzit niigi ma agoon talniin ci adayi dayiin ci meelik otot.

¹⁸ Alote waanice Juuza Cucana itene ween amonki iiyu zee been iiten ween amonki wec oorine eleeti, ma itene ceen amonki tuur o, uyubuzit niigi ma agoon talniin ci adayi dayiin ci meelik otot.

¹⁹ Gi zin ci goon aanyek ol ci Juuz abaa vitenaane o milinyik kanyakti talniin itene ceen amonki wec nyeelowe ci Adar o ma adayi dayiin ci meelik otot, ma aanyone dizkeenok ci dayiino o neen.

Iinya o Madicooco^e

²⁰ Eteyeedun ni Mordekai kaal ci agooni noko, ma itonek ol o Juuz dook o abaa loocowe o abal alaani Zeksas, o abaa ijoonun, kibeene o abaa reena weregeenya nicoko. ²¹ Aricaneek noogo gi ci goon ka kanyakti talniin itene ceen amonki wec o zee been iiten ween amonki tuur nyeelowe ci Adar o irkitook dook, ²² kiziti iinya ci eteedjai ol o Juuz moddeene o amarniin noogo, ma een nyeelok o ookcene luwa uneeg kizi talniin, ma ookcene boobiwoni uneeg kizi iiten ci aruyi baar talniinta neen. Eteyeedek ni niini noogo gi ci ka goon kuzuuti iinya nicoko kiziti iinya ci talniinto ma adayi ol dayiin ci meelik otot, ma aanyone dizkeenok ci dayiino, ma aanyek buk dizkeenok ol o amaat aronj tirteen.

²³ Agamta ni ol o Juuz ka kameda talniin nicini noko ebaal akataai niigi laadun e, ma agoon gi baal eteyeedek Mordekai noogo e. ²⁴ Abaaban waanice Aman ween geerti Amedaza, ween doole ci kidon o Agag o amarniin Juuz gi ci ka waan kidicaai Juuz dook lai, aarun ni maadico giye ci ka kidicaai noogo. ²⁵ Bar waanice ako mazi azii alaani baabani nico, eteyeed ricaniin ci ka keeya baabani o Aman ger baal anyayeek ol o Juuz e ka kabadaak gi nicini noono ele maany, ka niini kibeene logooz ogin kacabtoozek alemeeti keena kitiirwani. ²⁶⁻²⁷ Gi zin ci

^e9:20 Iinya o Madicooco: Azi Juuza ne, iinya o Purim o aku zooze o kazi pur otooge ci ol o Persiya, kazi keenj cin ne, maadico.

aween iinya nicigi kiziti Iinya ci Madicooco o neen (azi Juuza ne, Iinya ci Purim). Aaryek ni didi ol o Juuz eleeti keer ci ka kuzuuti ki dool ugeec been ol o oromtoozek noogo dook iinya ceen ram noko irkitook dook kɔkɔm eet ci areyeek ebaal aduwooneke noogo iinya ci anjeryai noko e, giye ci kaal o ayeedi weregeewe nico ki kaal baal acin niigi e, kibeen kaal o iinak noogo dook. ²⁸ Abon zin goon aada ol o Juuz iinya nicoko ma azooni noko zee been buulok ci naan avu e dook tatoognyaye dook, ki loocowe dook, kibeen kutuuryowe dook. Ma alañ ol ci Juuz o ki dool ci dool ugeec ka kerekteek Iinya ci Madicooco eegin ram noko naati atalniin irkitook dook.

²⁹ Eteyeedit ni alaani o naiye Esta ween tinaati Abiyail, kibeen Mordekai ween Juuzen alazeete uneen werege oma bodo ci ka keelti Iinya ci Madicooco noko zonne noko izi neen. ³⁰ Itoon ni Mordekai weregeenya nicoko koɗɗɗɗ olee ween Juuz dook loocowe ween kaboon codoi ki eetom ki toorgerem (127) looce o abal Zeksas dook, giye ci adarnaaki niigi Juuz ganon kibeen baayiz yaak, ³¹ ka kaanycek Juuza Iinya ci Madicooco noko keelit zonne noko ebaal aricaneeke Mordekai ween Juuzen been alaan o nai Esta noogo e ka kaanycek kiziti iinya cigeec kibeen dool ci doolenu, ma aduwaak buk noogo zoozok ci ka goon kotonɗi dayiin kibeen ci luwaanto. ³² Zin goole nico, aanyeyun ricaniiin ci Esta noko lootinok ci Iinya ci Madicooco noko kodooyit, eteyeede ni gi ci Iinya ci Madicooco noko weregeewe o ayeedine kaal o agooni.

Tiitinyon o Zeksas been Mordekai

10 ¹ Ma aanyek alaani Zeksas ol kuruyit meeri loocowe ogin abal kook kuruum ol o abaak liilok utugeetine buk. ² Ayeedi waanice kaala o tiitinyik kibeen kaal o adiɗɗɗɗ baal agoon alaani Zeksas, kibeen diɗɗiɗɗoonte baal aanyek niini Mordekai e dook, weregeewe o ayeedine kaala o agoon alaata o Midiya kibeen Persiya. ³ Waanice Mordekai ceen Juuzen noko, eet ci anowo ki alaan Zeksas alazeeta neen. Waanice niini eet ci tiitiny ɗɗɗɗ olee o Juuz, ma anole niigi dook noonɗɗ, eeci alinɗɗi niini bonat ci ol ogin ma azɗɗzak goon waanice niini Juuz dook gool ci ka kabaakti yaak.